

**Páwòlò cu wáràgà ji ndâ mbe kù
kili ta ɾè m̀ B̀ndi-Mb̀r̀r̀ gb̀
gbata
K̀L̀Ó̀S̀Ì̀ỲÀ**

¹ Ǹǹó a ye tí Páwòlò, mbe g̀i tí tú m̀ B̀ndi-Mb̀r̀r̀ tí Jézù 'do gb̀i có m̀ Mb̀r̀r̀ ká kù cu wáràgà tí ǹ; ze kù gbo gb̀i bà cu wáràgà tí nó ta ná'vindí ndoo Timàtéyò

² ji ndâ 'duù m̀ Mb̀r̀r̀ gb̀i gbata Kòlòsiyà, tí ndâ ná'vindí mbe kù 'vala toko ta B̀ndi-Mb̀r̀r̀ ta njembí ndú gbaànjé. Ze kù 'deke tí ze máa Mb̀r̀r̀ tí bu ndoo 'ví bàkà nambeè ji yo, yí delè 'ví si yo 'ví dù ta 'dè njembí yo.

Bà 'deke tí ta bà 'dè ǹk̀i maa ji Mb̀r̀r̀

³ Ze ta o 'dáá g̀i kù 'dè ǹk̀i maa ji Mb̀r̀r̀ tí Bù mbe tí ndoo Jézù tí B̀ndi-Mb̀r̀r̀ ta o tí nó náa ze má kù 'deke tí ze ji Mb̀r̀r̀ á tacó tí yo.

⁴ Tacó ze 'di tàwo bà tee njembí yo mítí B̀ndi-Mb̀r̀r̀ tí Jézù, ta tàwo bà zè ndâ 'duù m̀ Mb̀r̀r̀ 'dáá g̀i ǹk̀i maa m̀ yo g̀i.

⁵ Tacó à kù kpolo tí i tí nó náa yo kù koɾo có l̀i mítí nó á mí gb̀r̀r̀. Yo 'di có gítí i tí nó náa yo kù koɾo có l̀i mítí nó kpédélé'i ta o tí nó náa yo ù ta nje á gítí yúcó tí nó tí Banga-Ngú-Có ǹ.

⁶ Banga-Ngú-Có kù jò 'vèè cee muu to tí nó 'dáá g̀i, jé ká go bà 'vèè có tí nó gb̀i òkò tí yo 'do tí kpédélé o tí nó náa yo táánò 'di ta gb̀i yúcó gítí nambeè m̀ Mb̀r̀r̀,

⁷ á go ònínó náa yo 'di 'do mì Èpàfàràsì tí tó ka ze, náa ze kù bàkà nèté ta ndú. Yí a 'duù ònínó mbe kù bàkà nèté mì Bìndi-Mbírì ta njembí wó gbaànjé bìndi ze.

⁸ À delè a yí ká dità tó njembí bà zè tí tí nó náa Bèrì-mì-Mbírì je jì yo nó jì ze.

⁹ 'Do tí o tí nó náa Èpàfàràsì 'dè ta có jì ze nó, ze yee tí wúnó jé waa 'do tí bà 'deke tí ze jì Mbírì tacó tí yo lá. Ze ta o 'dáá gî kù yù nambeè á 'do mì wó, máa, yí 'ví je muu tacó bà bàkà go có mì wó jì yo me gbolò. Ze delè kù yù 'do mì Mbírì, máa, yí 'ví je bà 'di gbí-o gítí ndâ có mì wó jì yo.

¹⁰ Ze delè kù 'deke tí ze jì Mbírì máa, yí 'ví si yo 'ví 'vala go có mì Mbe tí ndoo, tí ña 'válá ònínó mbe kù peteke tàkòcò wó ta o 'dáá gî nô. Tacó wàa, 'válá mì yo 'ví dù a 'válá ònínó ta i ká gbí gbí ndâ ña ndâ tó nèté 'dáá gî, wàa muu yo 'ví njaanga gítí bà ò Mbírì ni .

¹¹ Ze delè kù 'deke tí ze jì Mbírì máa, yí 'ví dù gbí ngba wó 'ví je wotí jì yo me gbolò, tacó wàa yo 'ví zèè njembí yo, ta wotí bà kònò ndâ i 'dáá gî tókà'i ta tàkòcò yo pètékè'i ta o 'dáá gî.

¹² Yo 'ví 'dè òkì maa jì Buù tí mbe bàkà yo tí ndâ 'viì-'bá 'vii ká 'vii ta ndâ 'duù tí nó náa yí tí Mbírì kaa ndú mò gí mì wó gbí ngba'o gî nô.

¹³ Yí 'vala ndoo 'do gbí wotí mì 'dí'di'o mì vò i, bìndi yí gii 'dòkò ndoo gí 'bá mì kpóló-kpòlo 'Viì mì wó

¹⁴ mbe njaanga miři ndoo 'do gbí vò i, ta bà je à-cee-gî jì ndoo gítí ndâ vò i mì ndoo.

Ndâ nèté mì Jézù

15 Bìndi-Mbíṛì je a kózò tí Mbíṛì náa ndoo ṛò yí lá.

Yí a 'viì-kíṛì, tí kùṛo ndâ i tí nó náa Mbíṛì suu ndú nó 'dáá gî.

16 Tacó a yí ká suu ndâ i tàṛì, ta ndâ i muu to tí nó 'dáá gî.

A yí ká suu ndâ i ṛìnó náa ndoo kù ṛò ndú ta ṛo ndoo nó,
ta ndâ i ṛìnó náa ndoo ṛò ndú ta ṛo ndoo lá nô.

A yí ká suu ndâ gba, ta ndâ mbe to.

A yí ká suu ndâ mbe zogo 'bá, ta ndâ mbe wotí.

Mbíṛì je wotí bà suu ndâ i 'dáá gî a i jì yí.

Mbíṛì suu ndâ i 'dáá gî tacó tí wó.

17 Yí táánò sàà kuu tí kùṛo o bà suu ndâ i 'dáá gî.

A wotí mì wó ká kù ẹṛe ndâ i 'dáá gî toko gbaànjé.

18 A Bìndi-Mbíṛì ká kù túbà kpokèjì bà co tí jì ndâ 'duù tí nó mbe kù kili ta ṛè mì wó tí Bìndi-Mbíṛì nô.

Yí a ṛèngbó 'v alá.

Àá táánò jò yí tí 'viì-kíṛì mì ndâ ku,
tí kpédélé ku mbe 'vala 'do gbí muu'dú wó tacó wàa yí 'ví dù tí kpédélé 'duù gbí ndâ i 'dáá gî.

19 Mbíṛì bàkà éno tacó wàa ndâ i tí nó 'dáá gbí tú yí tí Mbíṛì nó
'ví dù kuu gbí tú 'Viì mì yì.

20 Mbíṛì tuu a 'Viì mì wó gí bà 'viindi kpokèjì gbí òkò tí ndú
ta ndâ i muu to tí nó, ta ndâ i tàṛì.

A bà cì 'Viì-mì-Mbíṛì mítí njèèkpè mú
ká si njembí Mbíṛì 'ví 'dèè gítí ndâ i 'dáá gî.

²¹ Káa yo, yo ta 'bí o táánò kù dù me 'dú 'do tí Mbírì, yo gbí ndâ o tí nò táánò a ndâ ku'dì tí Mbírì tacó njembí yo gbí o tí nò táánò a vò njembí, yo delè gbí ndâ o tí nò táánò a ndâ mbe bàkà vò i,

²² káa yí kpónó 'viindi nambeè gbí òkò tí yo ta ndú ta 'dóó dìi wó ta bà cì 'Viì mì wó. Mbírì bà kaa yo mò gí mì wó tí ndâ ngbárángà 'duù ta vò i mì yo wálá kùro wó,

²³ náa yo má ùnje gítí yúcó ta njembí yo gbaànjé, yo 'ví 'dò kò yo mí to tí kpoò toko ta Bìndi-Mbírì, yo 'ví koṛo có ta njembí yo sósò'ò gítí i tí nó náa Banga-Ngú-Có ci yo gítí nó lá nò, Banga-Ngú-Có tí nó náa à ma ji ndâ 'duù muu to tí nó 'dáá gí, náa ye tí Páwòlò a bòò mbe kù ma nò.

Páwòlò bàkà nèté ndâ mbe kù kili ta rẹ̀ mì Bìndi-Mbírì

²⁴ Tàkòcò ye kpónó peteke gítí bà kònò sé'i mì ye muu yo gí. Tacó bà kònò sé'i mì ye cee sè ndâ bà kònò sé'i mì Bìndi-Mbírì á muu dìi wó, tí ndâ mbe kù kili ta rẹ̀ mì wó tí Bìndi-Mbírì nó gí.

²⁵ Káa àá táánò bàkà ye tí bòò mì ndâ mbe kù kili ta rẹ̀ mì Bìndi-Mbírì; Mbírì je nèté tí nó ji ye, máa ye bàkà tacó tí yo. Nèté tí nò a bà ma Banga-Ngú-Có mì wó ji yo.

²⁶ Banga-Ngú-Có tí nò táánò a có kóó náa Mbírì ngùù 'do tí ndâ 'duù gbí ndâ ká o gí, káa yí kpónó 'dè gí sè ji ndâ 'duù mì wó gí.

²⁷ Mbírì 'dè có kóó tí nò gí sè ji ndâ 'duù mì wó, 'do ká gbí 'dóó có mì wó gbí njembí wó, tacó wàa, yo tí ndâ 'duù ònó náa yo me ndâ Jùdáyà

lá nó 'ví 'di ta serè banga có kóó tí nò. Có kóó tí nò éno máa, Bìndi-Mbírì kuu gbí njembí yo, tí 'duù náa yo kù koṛo có gítí bà dù gbí ngba Mbírì lì mítí wó.

²⁸ Tacó ènò, ze kù ma có tí Bìndi-Mbírì, ze kù ci ndâ 'duù 'dáá gí ta muu tí ze náa Mbírì ká je ji ze, delè kù nìbà i ji ndâ 'duù 'dáá gí ta gbèe ṅa muu tí nò, tacó wàa ze 'ví ya ta ndâ 'duù 'dáá gí gí kùro Mbírì tí ndâ yú 'duù mbe kù dù toko ta Bìndi-Mbírì.

²⁹ Nìnò a gbí nderè có tí nó náa ye kù bàkà ta nèté tí kpoò ta gbolò wotí tí nó náa Bìndi-Mbírì je ji ye nó ká nò.

2

¹ Go bà si yo 'ví ṅò ni éno máa, ye kù bàkà nèté tí kpoò tacó tí yo, ta ndâ 'duù gbí gbata Làwòdésìyà, delè tacó tí ndâ 'bí 'duù ṅìnó jé mbe ṅò ye ta ṛo ndú lá nó, kuu tí ye.

² Ye kù bàkà nèté tí kpoò nò, tacó bà je wotí mí gbí njembí ndú, tacó wàa ndú 'ví zè tí ndú gbí òkò tí ndú nìkì maa, wàa ndú 'ví dù toko gbaànjé. Tacó wàa muu ndú 'ví dù ngbárángà'i gítí bà 'di gbí có kóó mì Mbírì. Có kóó tí nò mì Mbírì tí Bìndi-Mbírì,

³ tí mbe njaanga njekèjì gálá bà 'di gbí-o ta muu mì Mbírì.

⁴ Ye 'dè có tí nò ji yo, tacó wàa yo 'ví si 'bí 'duù 'ví eendi yo ta bà toṛo bàà mítí ndâ mbù 'véṛè mì wó lá.

⁵ Tacó ye kpétí me mì yo kà lá, njembí ye ká gá'dáá tí yo, tàkòcò ye delè kù peteke gítí có bà

ere gba có mì yo tí kpoò kù tee ta njembí yo mítí Bìndi-Mbírì nò.

Bìndi-Mbírì gí ta yúcó 'válá

⁶ Yo lê má ùnje gítí Bìndi-Mbírì, tí Jézù tí Mbe tí ndoo gí, yo 'vala toko ta yí.

⁷ Yo 'ví nanaka mítí wó go cá tí ngbù tìtìi; yo sì 'bá mítí wó, yo tee njembí yo mítí wó tí kpoò, á go có tí nó náa à nìbà ji yo nò, wàa yo 'ví 'dè nìkì maa ji Mbírì ta njembí yo gbaànjé.

⁸ Yo 'ví kpolo ọo yo, máa, 'bí 'duù 'ví bàkà yo tí ndâ i mì wó ta bà eendi yo ta ndâ sú bà nìbà i ta rẹngbó ndú 'do ká mì ndâ 'duù muu to tí nó, ta ndâ kpo-kpò bààcì, á bìndi bà nìbà i tí nó mbe gí 'do mì Bìndi-Mbírì nó lá.

⁹ Tacó ndâ i tí nó 'dáá gbí tú Mbírì nó 'dáá gí kù 'vala gbí dìi Bìndi-Mbírì.

¹⁰ Tacó éno, ndâ i 'dáá gí kuu mì yo tacó yo kù 'vala toko ta Bìndi-Mbírì. Yí a gba mì ndâ bààcì ta ndâ gba 'dáá gí.

¹¹ Áá táánò ya ta yo gí gbí gázâ 'do gbí có bà dù yo toko ta Bìndi-Mbírì, káa à me 'duù ká waaka nje kù tí yo gbí gázâ tí nò lá. Gázâ tí nò a bà too dìi yo tí nó mbe yè ta vò i gí nó 'do tí yo gí, tí gázâ náa a Bìndi-Mbírì ká bàkà .

¹² Tacó bà caka tí yo táánò 'vii ká 'vii go bà duu yo toko ta Bìndi-Mbírì, Mbírì delè táánò 'vala yo 'do gbí muu'dú yo ta ndú, á 'do gbí có bà tee njembí yo mítí wotí mì wó tí Mbírì tí mbe 'vala Bìndi-Mbírì 'do gbí muu'dú wó.

¹³ Yo táánò a ndâ ku, náa ndâ vò i mì yo, gii je bà ya yo gí gbí gázâ tacó bà 'dii kù a 'do tí yo lá mì yo gí, káa Mbírì gii 'vala yo toko ta ndâ

Bìndi-Mbírì ta bà je à-cee-gî ji ndoo gítí ndâ vò i mì ndoo 'dáá gî gî.

14 Mbírì si có gítí i tí nó táánò muu ndoo náa kózò tí ndoo 'ví si có nó mí to, ta bà gbì i tí nó mítí njèèkpè mû.

15 Bìndi-Mbírì kpò nje ndâ kpo-kpò gba ta ndâ bààcì mítí njèèkpè mû, ta bà si ndâ 'duù muu to tí nó 'dáá gî kù ò bà ko tàkò ndú go bà ko tàkò ndâ 'duù gbí zàà ta o tí nó náa ndâ 'duù kù ko yí ta o bà kpò nje ndú mì wó nò.

16 À má ènò, yo si 'bí 'duù 'ví 'viiki yo gítí có i-zò-zò, ta có gítí pe lá. Yo delè 'ví si 'duù 'ví 'viiki yo gítí có ndâ kpo-kpò o, ta có gítí ngú pì, ta có gítí Rì bà wotí gbí tàkì mì ndâ Jùdéyà lá.

17 Ndâ i tí nó 'dáá káa ndâ tàzo i tí nó kèjì nò; cèe i tí nó kèjì nó a i mì Bìndi-Mbírì.

18 Yo 'ví si ndâ 'duù tí nó mbe kù kpomozo tí ndú ta bà mà tí ndú, máa ndâ yì a ndâ mbe kù ùlù ndâ basilì nó, 'ví zò yo lá. Ndú kù wu gbí tí ndú, máa ndâ yì a ndâ mbe kù ò ndâ i gbí rìi, káa gbí ndâ có mì ndú nò wálá, tacó à yè gbí muu ndú káa go ndâ i gítí mìrì ndú.

19 Nèté mì ndú káká'i ta Bìndi-Mbírì tí Kùro ndâ mbe kili ta rẹ wó nó wálá. Káa a Bìndi-Mbírì ká kù ko nje ndâ mbe kù kili ta rẹ wó, a yí ká kù si ndú 'ví dù toko gbaànjé go bà 'deeke ndâ bà to tí 'duù mì ndâ 'bilì ta ndâ yèlè kù uu go có mì Mbírì.

Bìndi-Mbírì gí ta ngú 'wálá

20 Yo táánò má cì ta ndâ Bìndi-Mbírì gí, wotí mì ndâ bààcì muu to tí nó gítí yo wálá. À má

énò, yo kù 'vala go i mì ndâ 'duù muu to tí nó tacó yè? Yo kù 'di ndâ ña có tí nó máa,

²¹ «Zèè i ñinó lá,» «I ñizó 'ví di gbí nje lo lá,» «Gàà 'bí ñinó lá,» nó tacó yè?

²² Ndâ có tí nó káa ndâ có mì ndâ 'duù á muu to tí nó, tacó à má zò i-zó-zò gî, à zò gî.

²³ Bà 'di ndâ có tí nó go tó i nó. Ndú go ndâ có mbe si 'duù 'ví zè Mbíri ñikì co tí ñinó sàà kùro nó gî, ndú delè go ndâ có mbe si 'duù 'ví si tí wó tí i lá, delè mbe si yí 'ví kpolo tí dii wó, káa wotí tí ndú gítí ndâ i gbí kù 'duù wálá.

3

¹ Mbíri táánò 'vala yo 'do gbí ku ta ndâ Bindi-Mbíri gî. À má énò, yo koṛo có kpolo ma a i gítí ndâ i ñinó gbíri, tí bàndò tí nó náa Bindi-Mbíri kù ki tí wó pí jàlambà mì wó gbí kù'bi mì Mbíri tí nó.

² Yo 'ví koṛo muu yo kpolo ma a i gítí ndâ i gbíri, me gítí ndâ i muu to tí nó lá.

³ Tacó yo táánò cì gî, káa à kpónó ngùù 'válá mì yo mí mì Bindi-Mbíri tí mbe kù dù á mì ndú ta Mbíri.

⁴ Káa ta o bà 'vanda Bindi-Mbíri tí 'válá mì yo nó wúnò gí ɾo ɾi, yo delè bà 'vanda ta ndú gí gbí ngba'o.

Ndâ ká 'válá ta ngú 'válá

⁵ Yo ziki ndâ vo-vò i tí nó ta go ndú tí yo muu to tí nó nó 'do gbí njembí yo gî: bà bàkà bangbaya, bà bàkà ndâ i ñinó mbe 'vii á ɾo 'bá lá, bà dù ta go ndâ vò i, ta bà dù ta gbolò njembí, tí bà si ndâ i 'dáá gî tí ndâ i bà ùlù ndú go bà ùlù Mbíri.

⁶ Tacó a ndâ ña ndâ vò i tí nò ká kù si kpo-tàkòcò mì Mbírì 'ví tè ndâ mbe 'di có mì wó lá.

⁷ Káa yo táánò sàà kù ɾu a ndi ña ndâ vò i tí nò, ta o tí nó náa ndú gèè bè ndú mí muu yo gí nò.

⁸ Káa yo kpónó 'ví duu gùù, wàa yo 'ví nè ndâ kòlòwò, ta kpo-tàkòcò, ta bà bàkà i ñìnó mbe kù mìlìsé tí ndâ 'bí 'duù, ta bà 'dè vò có, ta bà 'dè zu có, á mí gbí .

⁹ Yo 'ví 'dè 'véɾè á ji ndâ 'bí ka yo lá, tacó yo kpónó si ká ña bà 'vala ndò mì yo táánò nó, ta ndâ ká cè bà bàkà i mì wó táánò nó, mí to gí.

¹⁰ Yo kpónó kù 'vala a ngú ña 'válá, náa à kù 'visì muu yo ta o 'dáá gí tí ngú muu tacó bà je cè kózò tí mbe suu yo.

¹¹ Gbí ngú ña 'válá tí nò, 'bè gbí òkò tí ndâ Ìgìrìgì, ta ndâ Jùdèyà wálá, 'bè gbí òkò tí ndâ mbe ya gí gbí gázâ ta ndâ mbe ya gí gbí gázâ lá wálá, 'bè gbí òkò tí ndâ 'duù ñìnó ta nje có mì ndú me có Ìgìrìgì lá nó, ta ndâ mbe 'di gbí-o lá, ta ndâ i-zógó-zogo, ta ndâ 'duù ñìnó náa ndú me ndâ i-zógó-zogo lá nó, wálá. I 'dáá gí káa Bìndi-Mbírì, Bìndi-Mbírì delè a mbe toko ndâ i 'dáá gí.

¹² Mbírì zè yo nìkì ma, bìn̄di yí giì cu 'bì wó mítí yo tí ndâ 'dóó 'duù mì wó gí. Á má éno, yo 'vala ta ndâ 'duù ta pétékè có, yo bàkà nambeè ji ndâ 'duù, yo si tí yo tí i lá, yo dù tí ndâ 'dè 'duù, yo delè 'ví zèè n̄jembí yo.

¹³ Yo kònò tí yo gbí òkò tí yo, 'bí 'duù gbí òkò tí yo má bàkà vò i ta wò, wò 'ví je à-cee-gí ji yí, á go ñìnó náa Mbe tí ndoo je ta à-cee-gí ji yo nò.

14 Káa tó bà zè tí a kpóló-kpolo i co tí ndâ i 'dáá gî, mbe kû ẹre ndâ i 'dáá gî toko gbaànjé.

15 Yo 'ví si 'dê njembí tí nó náa Bìndi-Mbírì je ji yo nó 'ví túbà kpokèjì á ji yo, tacó ñìnò a nderè bà tè'é tí yo toko gbaànjé máa yo dù tí ndâ bà to tí gbèè dìi nó ká nò. Nògí, yo 'dè nìkì maa ji Mbírì.

16 Yo 'ví si ndâ có mì Bìndi-Mbírì 'ví dù gbí njembí yo me gbolò. Yo nìbà i, yo delè 'ví kpo-gbì-tà-tù yo gbí òkò tí yo ta muu yo me gbolò. Yo cè cè 'do gbí wáràgà mì Mbírì ji Mbírì, yo ùlù rẹ wó gbí cè, yo cè ndâ cè tí nó náa a ci ndú ji Mbírì gî nó ji yí, ta bà 'dè nìkì maa gbí njembí yo.

17 Yo 'ví 'dè ndâ có 'dáá gî, yo delè 'ví bàkà ndâ i 'dáá gî, ta rẹ Mbe tí ndoo Jézù, ta 'dè nìkì maa ji Mbírì Buu ta rẹ mì wó.

Nà bà 'vala ndò mì ndâ mbe kû kili ta rẹ mì Bìndi-Mbírì 'bá mì ndú gbí ngú 'válá

18 Yo tí ndâ nawù ndâ 'dakò 'ví 'di có mì ndâ 'dakò mì yo, tacó ñìnò a i ñìnó náa yo tí ndâ mbe kû kili ta rẹ mì Bìndi-Mbírì 'ví bàkà nó ká nò.

19 Ndâ bu niì, yo zè ndâ nawù yo nìkì maa, yo 'ví dù ta ndú 'bùrúkú-'bùrúkù lá.

20 Yo tí ndâ 'viì ta o 'dáá gî 'ví 'di có mì ndâ bu yo ta nawu yo. Tacó ñìnò a i ñìnó mbe kû peteke tàkòcò Mbírì nó ká nò.

21 Yo tí ndâ bu ndâ 'viì, 'ví kpolo tàkòcò ndâ 'viì mì yo lá, tacó yo bà gba gbí kii ndú.

22 Yo tí ndâ i-zógó-zogo 'ví 'di có mì ndâ 'duù tí nó tí ndâ mbe tí yo muu to tí nó nó 'dáá gî. Káa yo 'ví bàkà éno me ká mí tí ọ ndú tacó bà peteke

tàkòcò ndú lá, yo bàkà ta njembí yo gbaànjé, tacó bà te duù mí tí Mbe tí ndoo.

²³ 'Duù kpê tí má kù bàkà káa ña nèté yè wè, yí 'ví bàkà ta njembí wó gbaànjé, goolá yí kù bàkà a nèté mì Mbírì, me nèté mì ndâ 'duù lá.

²⁴ Yo 'ví te mí gbí muu yo éno máa, Mbírì bà ko mboo nèté mì yo ji yo ta bà bàkà yo tí ndâ 'viì-'bá mì wó, tacó yo kù bàkà nèté a i ji Mbe tí ndoo tí Bindi-Mbírì.

²⁵ Káa Mbírì bà kèèndè vò i mì ndâ mbe bàkà vò i ji ndú, tacó yí me mbe ñò gbíro 'duù gítí bà waa có mì wó lá.

4

¹ Ndâ mbe tí ndâ i-zógó-zogo, yo zèè ndâ i-zógó-zogo mì yo ta tó 'bì. Yo te mí gbí muu yo máa, Mbe tí yo delè kuu gbírì.

Páwòlò kpo-gbí-tà-tù ndâ mbe kù kili ta rẹ̀ mì Bindi-Mbírì

² Yo nanaka muu yo mí tí bà 'deke tí yo ji Mbírì. Yo 'ví kpolo tí yo, yo delè 'ví 'dè ñìkì maa ji Mbírì ta o tí nó náa yo má kù 'deke tí yo.

³ Yo 'deke tí yo ji Mbírì máa, yí 'ví njaanga kpokèjì bà ma có kóó mì Bindi-Mbírì ji ze. Tacó ñìnó a nderè có tí nó náa ye kpónó kuu gbí zàà nó ká nò.

⁴ Yo 'deke tí yo ji Mbírì máa, yí 'ví si ye 'ví ma có tí nò ngbàrángà'i, á go ñìnó náa à tí nò.

⁵ Yo 'ví bàkà i ta ndâ 'duù ñìnó náa ndú me ndâ mbe ùnje gítí Bindi-Mbírì lá nó ta muu tí yo. Yo si o tí nó náa yo kuu bà gbèè to ta ndú nó tí o náa Mbírì wu ji yo tacó bà konì ndú.

⁶ Yo ta o 'dáá gî 'ví 'dè banga nje, tí nje ñìnó ta gbí a gbí nó ta ndú, tacó wàa yo 'ví ni ta bà 'visì có ji ndú 'dáá gî.

Ndâ ndòngbú 'vé

⁷ A Tíkíkùsù ká bà 'dè ndâ có ñìnó náa à tí ye kàá nó ji yo. Yí a tó ná'vindí ndoo, yí delè a 'duù ñìnó mbe kù bàkà nèté ta njembí wó gbaànjé, tí ka ndoo bòò mì Mbe tí ndoo.

⁸ Ye kù tuu yí tacó wàa yí 'ví 'dè ndâ có ñìnó náa à tí ze kàá nó ji yo, wàa yí delè 'ví je wotí ji yo.

⁹ Ye kù tuu ndâ Tíkíkùsù ji yo ta 'bí kpóló-kpolo ná'vindí ndoo mbe tee njembí wó 'dáá gî mítí Bìndi-Mbírì, ta rẹ wó a Ònésimò, tí 'dóó 'duù mì yo. Ndú bà 'vanda ndi ndâ i ñìnó mbe bàkà tí mì ze kàá nó gbaànjé-gbaànjé ji yo gî.

¹⁰ Àrìsítàrikù tí ka ye náa ze kpónó kuu gbí zàa ta yí 'vee yo ma. Màrikò tí nó tí ná'vindí Bàrànáà, náa à 'dè có gítí wó á ji yo sàa gî nó, má ya gí mì yo kà, yo 'ví te wìri mítí wó.

¹¹ 'Dakò tí nó ta rẹ wó a Jézù, náa à kù nì Júsitò mítí wó nó delè 'vee yo ma. Ndâ 'dakò tí nò a ndâ 'duù ta'ò cuki, tí ndâ Jùdáyà ñìnó, kpónó náa ze kù bàkà nèté gítí 'bá mì Mbírì á ta ndú, ndú delè kù konì ye ngé ndii gî.

¹² Èpàfàràsì tí nò tí 'bí 'duù mì yo gbaànjé, tí bòò mì Bìndi-Mbírì tí Jézù nó, 'vee yo ngé ma. Yí ta o 'dáá gî kù 'deke tí wó ji Mbírì ta njembí wó gbaànjé tacó tí yo, tacó wàa yo 'ví dù tí ndâ yú 'duù, ta kponje nje yo gítí bà bàkà go có mì Mbírì wálá.

¹³ Ye bà 'dè có ta yúcó muu wó gî, máa, yí kù bàkà nèté tacó tí yo ta ndâ 'duù gbí ndâ gbata Làwòdésìyà ta Ìyèràpólìsì ta wotí ká tí .

¹⁴ Ndâ Lúkà tí nó tí tó mbe kù bàkà yeè ji ndâ 'duù nó, ta Démàsì 'vee yo.

¹⁵ Ye 'vee ndâ 'duù gbí gbata Làwòdésìyà 'dáá gî, ye delè gù 'vee niì tí nó tí Nífà, ta ndâ mbe kù kili ta ọ̀rè m̀ Bìndi-Mbírì mí 'bá m̀ wó nó 'dáá gî.

¹⁶ À má 'deke wáràgà tí nó ji yo gî, yo 'ví te mí gbí muu yo máa, yo 'ví ya gí bà 'deke á ji ndâ mbe kù kili ta ọ̀rè m̀ Bìndi-Mbírì gbí gbata Làwòdésìyà. Yo delè 'ví 'deke 'bí wáràgà m̀ ye tí nó náa ndâ 'duù gbí gbata Làwòdésìyà bà tuu ji yo nò.

¹⁷ Yo 'ví 'dè có ji Àrikípúsù máa, «Te mí gbí muu lo máa, wò 'ví cee nèté tí nó náa Mbe tí ndoo je ji wò nò.»

¹⁸ Nìnó káa 'dóó ye tí Páwòlò ká kù cu ndâ 'vé tí nó mí gbí wáràgà tí nó nó ta 'bì ye ji yo. Yo 'ví ò-bà-mbí ye gbí zàà lá. Ye kù 'deke tí ye ji Mbírì máa, yí 'ví bàkà nambeè ji yo.

Ndogo
Ndogo: Ngú bà toko nambeè mî Mbîrî ta ndâ 'duù
New Testament

copyright © 2001 Wycliffe Bible Translators, Inc.

Language: Ndogo

Contributor: Wycliffe Bible Translators, Inc.

All rights reserved.

2025-05-16

PDF generated using Haiola and XeLaTeX on 16 May 2025 from source
files dated 16 May 2025

14424ae9-b5af-591e-814e-49316d8d74aa